

E GRAN CARNAVAL 1956

Un jamada di cooperacion na pueblo di Aruba

ORANJESTAD. — Comicion di Carnaval 1956 a informa nos lo siguiente:

„Ta acercando e gran dianan di fiesta di Carnaval. Mescos cu anja pasa, Aruba ta preparando pa celebra es Carnaval e anja aki, cu mes entusiasmo y alegria. Pueblo di Aruba a duna su apoyo grandi pa organiza anja pasa un Carnaval pa henter Aruba, es anja aki tambe nos ta conta cu apoyo di henter pueblo di Aruba. Es Carnaval di anja pasa tabata asina un excito grandi, cu pafor di nos isla tabatin bon comentario ariba nos Carnaval, y ta sigur cu es anja aki nos por spera hopi hende bin pasa e dianan di Carnaval aki na Aruba.

Nos ta conta cu cooperacion di tur e Clubnan ariba Aruba, organiza fiestanan grandi den e Clubnan, elegi boso reinanan y larga nan tuma parti den e gran eleccion pa e honor di mas grandi esta **SER ELEGIDO COMO REINA DI CARNAVAL ARUBA 1956.**

Forma un bunita grupo di autonan dorna pa tuma parti den e gran parada dia 12 di Febrero. Nos ta conta cu tur donjonan di auto pa companja nos **PRINS** den un parada pa tuma mando di nos isla dia 5 di Februari pa 11'or di mainta. Nos a pidi e dos radionan pa prepara un pro-

grama di Carnaval pa e ocasion aki, y autonan sintonisando riba e programanan aki lo brinda un lluvia di musica.

Na nos comerciantenan nos ta pidi pa di awor caba nan cuminsa dorna nan show-windows den un atmosfera di Carnaval, nos ta conta cu masha hopi autos of truck den e gran parada, vehiculos presentando propagandas di e gran productos cu nan ta bendiendo ariba plaza.

Carnaval na Aruba ta en marcha y Carnaval na Aruba lo bira cada anja mas grandi y mas bunita, pueblo di Aruba ta tras di e gran fiesta aki”.